

दिनांक 30.06.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- उपराष्ट्रपति जगदीप धनखड़ बातचीत ने लोकतंत्र रो खास पहलू बतायो।
- राज्य सरकार श्री राजीव शर्मा ने प्रदेश रा नुवा पुलिस महानिदेशक बणावण री मंजूरी दीनी।
- ऊर्जा मंत्री हीरालाल नागर प्रदेश ने बिजली रा हलका मांयअगाड़ी बणवण रो संकल्प दोहरायो।
- प्रदेश मांय काल ऊं स्टॉप डायरिया अभियान सुरू व्हेला— 15 अगस्त ताई ओआरएस रा पुडका अर जिक री गोळियां दी जावेला।
- प्रदेश रा ऊगणी हलका मांय काल ऊं जोरदार बरसात रा आसार— आतूणी हलका मांय 2 जुलाई ऊं बिरखा मांय बधोतरी री संभावना।

उपराष्ट्रपति जगदीप धनखड़ बातचीत ने लोकतंत्र रो खास पहलू बतायो है। श्री धनखड़ आज जयपुर रा कॉन्स्टीट्यूशन क्लब मांय पूर्व विधायक संघ री ओर ऊं राख्यी ज्या स्नेह मिलन अर सम्मान समारोह मांय बोल रह्या हा। वे कह्यो के सियासत मांय मतभेद व्हे सके है, पण मनभेद नी व्हेवणो चाहिजे। श्री धनखड़ कह्यो के प्रजातंत्र मांय चर्चा, वाद-विवाद अर बात केहवणो घणो खास व्हे है अर स्वस्थ बहस लोकतंत्र री ओळखाण व्हे है। उपराष्ट्रपति कह्यो के दूजा री बात सुणबो ई जरूरी है, जिण ऊं लोकतंत्र मजबूत बणे है। श्री धनखड़ सियासत रा मौजूदा हालात मांय वाद-विवाद रा गिरता स्तर माथे चिंता जताता थकां कह्यो के ओ म्हाणी हजारां साल जूनी संस्कृति ऊं मेल नी खावे है।

.....

उपराष्ट्रपति आपरेशन सिंदूर रो जिक करता थकां कह्यो के आतंकवाद रो करड़ाई ऊं जवाब देवणो जरूरी है। वे ऑपरेशन सिंदूर पाछे भारत री बात दुनिया सामी रखण सारू न्यारी-न्यारी पार्टिया रा सांसदां ने दूजा देशां मांय भेजण रा सरकार रा फैसला री ई सराहवणा करता थकां कह्यो के देश रे बाहर राष्ट्र म्हाणो धर्म व्हे है। उपराष्ट्रपति कह्यो के दलगत राजनीति ऊं ऊंचा उठ र करी ज्या फैसलां रो सकरात्मक नतीजो व्हे है।

.....

जळसा मांय राज्यपाल हरिभाऊ बागडे कह्यो के संविधान सब ऊं ऊंचो है अर लोकतंत्र री मजबूती सारू सगळां ने मिल र काम करणो चाहिजे।

.....

वे पैली वाळां विधायकां ऊं पेंशन अर विकास रा दूजा मुद्दा माथे तालमेल सागे काम करण माथे जोर दीनो। कार्यक्रम रे दौरान विधानसभा मांय विपक्ष रा नेता टीकाराम जूली ई मौजूद रह्या।

केन्द्रीय सहकारिता मंत्री अमित शाह देश मांय सहकारिता हलका ने मजबूत बणावण माथे जोर दीनो है। वे आज नई दिल्ली मांय राज्यां अर केन्द्र रा राज वाळा प्रदेशां रा सहकारिता मंत्रियां सागे मीटिंग मांय बोल रह्या हा। मीटिंग मांय दो लाख नुवी बहुउद्देश्यीय प्राथमिक कृषि ऋण समितियां अर डेयरी अर मछली पालन सहकारी समितियां खोलण समेत न्यारा-न्यारा मुद्दां माथे चर्चा करी ज्यो। ई सागे ई सहकारी हलका मांय अनाज भेळो करण री दुनिया री सब ऊं मोटी योजना माथे ई विचार करी ज्यो।

प्रधानमंत्री नरेन्द्र मोदी 2 जुलाई ऊं पांच देशां रो दौरा करेला। श्री मोदी घाना, त्रिनिदाद अर टोबैगो, अर्जेंटीना, ब्राजील अर नामीबिया रा दौरा सारु जावेला। विदेश मंत्रालय रे मुजब प्रधानमंत्री यात्रा रा पैला दौर मांय घाना जावेला। आ वां री पहली घाना यात्रा व्हेला। श्री मोदी घाना रा राष्ट्रपति ऊं मुलाकात कर र दोन्यू देशां बीचे साझेदारी रा बारा मांय ई चर्चा करेला। ई सागे ई निवेश, ऊर्जा अर रक्षा सहयोग माथे ई बातचीत व्हेला।

श्री राजीव शर्मा ने प्रदेश रा नुवा पुलिस महानिदेशक बणाया जावेला। श्री शर्मा 1990 बैच रा आईपीएस अहलकार है। राज्य सरकार ई सारु श्री शर्मा ने रिलीव करण बाबत् केन्द्र सरकार ने खत लिख्यो है। राजीव शर्मा फिलहाल नई दिल्ली मांय ब्यूरो ऑफ पुलिस रिसर्च एण्ड डवलपमेंट रा मुखिया है। वे प्रदेश मांय ई न्यारा-न्यारा ओहदां माथे सेवा दीनी हैं। कार्यवाहक पुलिस महानिदेशक अर भ्रष्टाचार निरोधक ब्यूरो रा महानिदेशक रवि प्रकाश मेहरड़ा आज रिटायर व्हे गया। ई मौके जयपुर री राजस्थान पुलिस अकादमी मांय राख्यी ज्या कार्यक्रम मांय वां ने रीत मुजब विदाई दीरीजी। एसीबी रा महानिदेशक ओहदा रो कामकाज एसीबी री एडीजी स्मिता श्रीवास्तव ने संपी ज्यो है।

राजस्थान प्रशासनिक सेवा रा 16 अहलकारां ने भारतीय प्रशासनिक सेवा मांय तरक्की दीरीजी है। यूपीएससी बोर्ड री नई दिल्ली मांय व्ही मीटिंग मांय मंजूरी पाछे केन्द्र सरकार रो कार्मिक अर प्रशिक्षण विभाग ई बाबत् अधिसूचना जारी कर दीनी है। इण मांय 1997 बैच रा 13 अर 1998 बैच रा 3 आर. ए.एस., आई.ए.एस. बणया है।

ऊर्जा मंत्री हीरालाल नागर कह्यो है के राजस्थान ने बिजली रा हलका मांय अगाड़ी बणावण सारु तैयारी सुरु कर दीरीजी है। श्री नागर आज बारां मांय ऊर्जा विभाग रा अहलकारां सागे मीटिंग कर र ज़िला मांय बिजली री पूर्ति रा काम रो जायजो लीनो। ई पाछे खबरनवीसां सागे बातचीत करता थकां श्री नागर कह्यो के प्रदेश मांय सूरज री रोशनी ऊं बणबा वाळी बिजली री ज़रूरत रे मुजब उपलब्धता है।

.....

अलवर ज़िला रो सरिस्का टाइगर रिजर्व चौमासा ने ध्यान राखता थकां काल ऊं सैलाणियां सारु बंद रहवेला। म्हाणा खबरनवीस बतायो के अभ्यारण्य मांय हर साल री भांत ई साल ई काल ऊं तीन महीनां सारु सैलाणियां री आवाजाही नी व्हे सकेला।

.....

काल राष्ट्रीय डॉक्टर दिवस मणायो जावेला। डॉक्टरां रा काम रा मान मांय हर साल एक जुलाई ने ओ दिन मणायो जावे है। इण रो ई साल रो मुद्दो “मुखौटे के पीछे—उपचार करने वालों को कौन ठीक करता है” राख्यी ज्यो है। ई मौके केई ठौड़ां ईलाज रा शिविर अर मान जळसा राख्या जावेला। काल ई सी.ए. डे ई मनायो जावेला। ई मौके जयपुर मांय इंस्टीट्यूट ऑफ चार्टर्ड एकाउंटेंट्स ऑफ इंडिया री शाखा मांय खूनदान शिविर अर चिकित्सा जांच शिविर सागे न्यारा-न्यारा कार्यक्रम राख्या जावेला। एक जुलाई ने जीएसटी डे ई मणायो जावे है। केन्द्र सरकार देश रा सब ऊं मोटा कर सुधारां मांय गुड्स एण्ड सर्विस टैक्स—जीएसटी ने कारोबार मांय सुविधा सारु लागू कीनो हो। ई रा तैत राज्य अर केन्द्र सरकार कानी ऊं लगाया जावण वाळा न्यारा-न्यारा करा ने जीएसटी रा तहत लायी ज्या। जीएसटी लागू करण रो मकसद एक देश—एक मार्केट—एक टैक्स रा विचार ने लागू करणो हो। जीएसटी लागू व्ह्या पाछे देश मांय कर भेळो करण मांय तेजी आयी है। काल ऊं रेल यात्रा सारु टिकिट करावण री आईआरसीटीसी वेबसाइट माथे केवल प्रमाणित उपयोगकर्ता ही तत्काल टिकिट बुक करा सकेला। ई सारु काल मोबाइल एप ई सुरु कर्यो जावेला। तत्काल टिकिट बुकिंग सारु ओटीपी आधारित प्रमाणन सुविधा मिलेला।

प्रदेश मांय काल ऊं स्कूलां रो नुवो सत्र ई सुरू व्हेला। माध्यमिक शिक्षा निदेशक सीताराम जाट बतायो के शिक्षा विभाग ई सारु ज़रूरी तैयारियां पूरी कर लीनी है। नुवो सत्र आवता साल तीस अप्रैल ताई चालेला।

प्रदेश मांय काल ऊं स्टॉप डायरिया कैम्पेन चलायो जावेला। इन रो मकसद बच्चां मांय दस्त रे कारण व्हेवण वाळी मौता री रेट कम करणो अर सफाई अर ओआरएस काम लेवण रा बारा मांय जाग जगावणो है। 15 अगस्त ताई चालण वाळा ई अभियान रे दौरान आंगनबाडी केन्द्रां अर स्कूलां मांय ओ.आर.एस. अर ज़िंक कॉर्नर बनाया जावेला।

प्रदेश रा ऊगणी हलका मांय काल ऊं अर आतूणी हलका मांय 2 जुलाई ऊं चौमासा री बिरखा रा दौर मांय तेजी आवण रा आसार है। मौसम विभाग आज अलवर, भरतपुर, धौलपुर अर जयपुर समेत 10 जिलां मांय जोरदार बायरो बाजण सागे भारी बारिश सारु चेतायो है। मौसम केंद्र जयपुर रा निदेशक राधेश्याम शर्मा बतायो के राज्य मांय आवता चार दिन सारु बिरखा रो येलो अलर्ट जारी करी ज्यो है। श्री शर्मा लोगां ऊं आंधी-तूफान अर तेज बारिश रे दौरान हिफाजत वाळी ठौड़ां माथे रहवण री अपील कीनी है।

.....

चूरु मांय काल सब ऊं बत्ती साढे आठ सेंटीमीटर बिरखा व्ही। माउंट आबू, डूंगरपुर, श्रीगंगानगर, पिलानी अर डबोक समेत केई ठौड़ां हलकी बारिश व्ही। चौमासा री बिरखा सुरू व्हेवण सागे ई काश्तकार बुवाई सुरू कर दीनी है। म्हाणा जालौर खबरनवीस बतायो के चौमासा री पैली बिरखा ऊं किसाना मांय खुशी रो माहोल है।

.....

चौमासा री ई रूत मांय हाल ताई राज्य रा 692 छोटा-मोटा बंधा मांय ऊं 28 बंधा पूरा भर गया है। जून महीना मांय एक दिन मांय सब ऊं बत्तो बीस सेंटीमीटर पाणी बारां जिला रा उम्मेद सागर मांय बरस्यो।